

Eskubaloia

laburrean

ATLETISMOA

■ Behobiako antolatzaileek igandean irteerara autobusean joateko eskatu dute

DATORREN igandean korrituko da 20 kilometroko Behobia-Donostia proba eta, beti bezala, baliteke trafiko arazoak egotea. Behobia eta Irun aldean sortzen dira beti arazo horiek. Ebitatzeko, probako antolatzaileek irteerara autobusez joateko eskatu diete partehartzaileei eta hauen lagun edo senideei. Irteerara hurbilduz gero, berriz, autoa Hendaiako aduanan uztea hobe izango dela esan dute. Behobia ez baita oso leku aproposa. Probari dagokionez, 9.000 bat atletak parte hartzea espero dute antolatzaileek. Horien artean izango dira, besteak beste, Diego Garcia, Apalanza, Juzdado, Torres, Kamel Ziani eta Atienza gizonetakoak, eta Irizar eta Fuentes emakumeetakoak. X

TXIRINDULARITZA

■ Olano Monakon biziko da hurrengo urteetan zerga gutxiago ordaintzeko eta Romingerrekin entrenatzeko

ABRAHAM OLANO, duela gutxi errepideko munduko txapelketa irabazi zuen gipuzkoarra, Altzo (Gipuzkoa) utzi eta Monakora joango da bizitzera hemendik lasterrera. Bertan biziko da urteko sasoi batzuetan. Bere managerra den Marc Bivert suitzarrak eragina izan du anoetarraren erabakian. Monakon, zerga gutxiago ordaindu beharko ditu eta horrek izan du, bai, zerikusirik Olanorengan. Taldekide duen Toni Rominger suitzarra ere han bizi da eta berekin entrenatu ahal izango da. Bestalde, baliteke Olanok aurki Mapei ekipoarekin hiru urteko kontratua sinatzea. X

FUTBOLA

■ Athletic taldeak 1.200 bazkide lortu ditu kanpaina hasi eta lehendabiziko egunean

ONGI hasi da bazkide berrien kanpaina Athleticentzat, lehendabiziko egunean 1.200 pertsonak eman baitzuten izena. Jose Mari Arratek zuzentzen duen taldeak 8.000 bat bazkide berri lortzeko asmoa du, horrela zelai berria egiteko aukera gehiago izango dutelakoan. Fernando Otxoa gerenteak atzo esan zuen oraindik ere goiz dela balorazioak egiteko, eta kanpaina laburra baina bizia izango dela. X

■ Sestao zelan saldu ari dira negoziatzen egungo jabeak eta taldea erosi nahi dutenak

SESTAOREN egungo jabeak eta taldea erosi nahi duen taldeko ordezkariak bildu ziren atzo River zelan saldu erabakitzeko. Azpitarte Larruzeak, akzio gehien jabeak, eta Azpitarte Machok, administrazio kontseiluko buruak, akzioak doan emateko prest badaude ere, 80 milioi eskatzen dute euren diru ekarpenengatik. Sestao Sport erosteko prest dagoen taldearen ustez, dirutza horrek askoz txikiagoa behar luke. Hortxe dago kokxa. Diru aportazioen inguruan akordioa lortuz gero, ez litzateke arazorik izango jabetza aldaketa gauzatzeko. X

SASKIBALOIA

■ Utah eta Orlandok irabazi egin zuten, Karl Malone eta Anfernee Hardaway jokalariei esker

UTAH taldeko Karl Malone hegal-pibota eta Orlandoko Anfernee Hardaway joko antolatzailea izan ziren atzoko NBAko jardunaldiko protagonistak, beraiek izan zirelako euren taldeetako jokalaririk garrantzituena. Utah taldeak 105-96 irabazi zion Atlantari eta 2,05 metroko Malonek 23 puntu egin zituen. Orlando, Shaquille O'Neal gabe, 105-95 gailendu zitzaion Washington-i. 2,01 metroko Hardawayk 25 puntu sartu zituen, bere taldeko Grant-ek bezala. X

RUGBYA

■ Irlandak eta Eskoziak ere Europako Txapelketa jokatu ahal izango dute 1997tik aurrera

EUROPAKO TXAPELKETAK beste bi selekzio izango ditu 1997. urtetik aurrera, egun jokatzen duten Ingalaterra, Gales eta Frantziarekin batera, Irlanda eta Eskozia ere lehian ariko direlako. Batzuek kritikatu egin dute erabaki hau, Irlanda eta Eskozia talde gazteegiak direla esanez, baina Rugby Leagues-eko zuzendaria den Maurice Lindsay adierazi du egungo torneoak ez dela behar bezain ona eta horregatik hartu dutela erabakia. X

HERRI KIROLAK

■ Olasagasti eta Arrospideren arteko desafioa abenduaren 10ean jokatuko da


JOSE MARI OLASAGASTIK botatako desafioari Anjel Arrospidek erantzun zion eta zaletuek espero zuten apustua abenduaren 10ean egingo da. Aizkolari bakoitzak milioi bat pezetak (40.000 libera inguru) jarriko du jokoa. 80 ontzako zortzi enbor moztu beharko dituzte eta oraindik ez da apustuaren lekua zehaztu. X

Ligan seitik lau puntu atera eta European ligatxora sailkatu

Azaroan hori bete ezean, zigorra jasoko du Elgorriaga Bidasoak

Elgorriaga Bidasoak aspaldi honetako momenturik latzenak bizi ditu. Joan den igandean Teucroren aurka galdu eta gero, Ligako bi liderrengandik bost puntura geratu zen Irungo taldea. Herenegun gauean, berriz, Zuzendaritza Batzordeak jokalaririk zigortzea erabaki zuen, baldin eta hauek azaroan zehar helburu batzuk betezen ez badituzte.

Pello Aiestaran / Donostia



Nenad Perunicicen golak ikusteko modua izango da berriro gaur Artalekun.

EDURNE KOCH

Teka Jakimovic eta Jukovekin ariko da ziurrenik • Kontuak kontu, Elgorriaga Bidasoak gaur ekingo dio zuzendaritzak botatako erronkari, Artalekun (20.00) eta Teka indartsuaren aurka. Kantabriarrak Asobal Ligako lidergoan daude Barcelonarekin berdinduta, biak ere oraindik punturik galdu gabe. Julian Ruizen mutilek ez zuten espero bezain denboraldi ona egin iaz, baina badirudi aurten gauzak zuzendu egin dituztela, eta dene-

tarako prest daude. Xabier Mikel usurbildarrak lesionatuta jarraitzen du, eta Urdiales eta Dominguez hegalek ez dute ziurrenik jokatzetik izango. Bai ordea Jakimovicek, Bielorrusiarekin aritu eta gero. Jukov piboteak osatuko du atzeritarren bikotea, Medvedev kalterako.

Elgorriagari dagokionez, Perunicic eta Kisselev Irunen daude. Lehenak jokatuko du; errusiarrak arazoekin jarraitzen du eta ikusi beharko da nola dagoen. X

Saskibaloia

Taldearentzat babeslea aurkitzeko eskatu dio Nafarroako Gobernuak Juan Ustarrozi

CBNko entrenatzaileak astebeteko epea izango du Gobernuari erantzuteko

Erredakzioa / Iruñea

NAFARROAKO Gobernuak CBNren bideragarritasun plana aurrera eramango du, baldin eta Juan Ustarroz saskibaloia taldeko entrenatzaile eta lehendakariak CBNrako babeslea lortzen badu. Hala esan zion Vicente Ripa Nafarroako Gazteri eta Kirol Institutuko zuzendariak CBNko entrenatzaileari, herenegun izandako bileran. Proposamen berria dela-eta, Ustarrozek ez zuen atzo

erantzunik eman; saskibaloia taldeko entrenatzaileak iragarri zuenez, heldu den astera arte itxarongo du bere erabakia plazaratzeko.

Ostiralean, bi eguneko gose greba egin ondoren, Juan Ustarrozek CBNrako bi urteko bideragarritasun plana adostu zuen Kirol Institutuko zuzendariarekin. Plan hori aurrera eramateko, baldintza gisa babeslea topatzea ezezik taldeko kontuak aurkezteko ere eskatu dio Nafarroako Gobernuak. Vicente Ripak adie-

razi zuenez, CBNren funtzionamendua erregulatu aurretik, baliteke auditoria bat egitea.

Bideragarritasun plana mar txan jarritz gero, saskibaloia taldeak horretan aurrikusitako helburuak eta asmoak bi urteko epean lortuko ez balitu, CBN taldea desagertu egingo litzateke. Bideragarritasun planari esker, berriz, saskibaloia taldeak partiduak jokatzen segitu eta, era berean, hogeita bost milioi pezetako zorra kitatzeko aukera izango luke. X